

Sel Prestuhn
Dieter F. Uchtdorf

Mwet in Kahsrh Ahkluo ke
Prestuhnsi Se Met



Pacl Wo Emet in Yukiac soko Sahk

Ke acn mahtuh Rome, Janus el pa god luhn ma muhtwacwacack uh. El kwacna ahkkahlwemye-yuck ke muhta luo—sie ngwet nuh tok nuh ke ma somlah, ma se sahyac an ngwet nuh met nuh ke ma fahsrh uh. Kuhtuh kahs uh pahngon mahlwem luhn Jacnweri tohkohl ke srihpen muhtwacwacyen yac uh pa sie pacl nuh ke motko ac oacyacpac plwacn.

Tausin ke yac tohkoh, facsin pucspucs fin facluh tahfwelah na sie facsin in orwacrah plwacn in eklac nuh ke yac sasuc uh. Pwacyena, orwacrah plwacn in eklac uh fihsrwacsr—liyacacng pa sie ma siena liki nohfohn.

Sie mukul suc orwacrah sie tahk loeloes ke plwacn in eklac luhn Yac Sasuc puhla wo na pwacye ke kapkapwack lal an. El nuhnkuh sel sifacna, “Ne ingena, nga srwackna mongo fal, nga soenna kasrkuhsrakwack, nga srwackna liyacacng sisi mani luhk, ac soenna oasr sie pacl nga tohrkahskahs ke kosro nuhtin mwet tuhlan uh. Tuhsruhk mihsenge pa Jacnweri 2 ac ao in okahk sac kahskahs ac pacl luhk in tuhkahkwek. Ac enenuh sie ma usrnguck in kalweni in ukwe finsrak luhk nuh kwewa.”

Sifilpac Muhtwacwacack

Oasr sie ma wolacna sesseslah ke finsrak ke sie muhtwacwacack sasuc. Nga muh ke sie pacl kuh siepacna

kuht nohfohn luhngse in sifil muhtwacwacack ke wacngihn tahfonglac.

Nga luhngse eis sie computer sasuc ke sie hard drive nwacsnwacs. Ke kihtin pacl ac orekma arlac wo. Tuhsruhk ke lwen uh ac wik uh somlah ac kain in procracm uh ituckyang nuh kac (kuhtuh ke oasr srihpac ac kuhtuh tiac), te paht na computer sac muhtwacwacack in muhsruhl, ac ma tuh orekmakihnyuck nuh kac an sana ac muhtwacwacack suhmuhilac. Kuhtuh pacl uh ac tiac orekma na pwacye. Finne in oruh in muhtwacwacack kuh in eklac nuh ke sie orekma ke hard drive sacn sesseslah ke ma tiac enenweyuck ac wacngihn srihpac. Oasr kuhtuh pacl ke mwe kahsrh sefanna pa in elah computer an ac sifilpac muhtwacwacack.

Mwet uh kuh pac in eklac sesseslah ke sahngweng, tahfuhluo, ac mwacta ma arlac toasr. Tahfonglac kuht orwacrah uh (kwewana ma orek in oacyac kuh tiac) kuh in toasrlac nuh sesr nuh ke oacna in upac in oruh ma kuht etuh muh kuht enenuh uh.

Ke ohiyac luhn ma koluk uh, oasr sie ohiyac wolacna in sifil elah pahngpahng auliyak ma lwelah kuht in ahkmwesahsyelah insiacn hard drive lasr ke ma sesseslah ma ahktoasrye insiacsr. Wosasuc uh, ke Iwacrah usrnguck ac pahkotwen luhn Jisus Kraist, ahkkahlwemye nuh sesr inkacnek in ahknwacsnwacsye nguhnasr ke

tuhnin ma koluk ac in sifilpac eklac sasuc, nwacsnwacs, ac wo mwacta oacna sie tuhlihk.

Tuhsruhkuhtuh pacl uh ma sahyac uh ahksuhmuh-iyeye kuht ac sruok kuht, orwaclah nuhnac ac mukwikwi tiac wo ma oruh upac nuh sesr in muhtwacwacack.

In Orwaclah Kuhiyacsr Nohfohn

Oakiyac finsrak pa sie ma wo in oruh. (Kuht etuh lah oasr finsrak luhn Pahpah tuhmasr Inkuhsrao ke srihp-
pen El fahk nuh sesr lah orekma ac wolacna Lal pa “in ahkfahsryelah moul kawihl ac ma pahtpaht luhn mwet uh” Moses 1:39).

Finsrak lasr sifacna uh kuh in orwaclah kuhiyac wo emet kacsr. Ne ohinge, sie sin ma ma tulohkihn kuhiyacsr in orwaclah ac liyacacng plwacn in eklac pa in kotwaclah. Kuhtuh pacl uh kuht uh kohtwaclah muhtwacwacack uh, sano nuh ke pacl fal in muhtwacwacack —lwen se emet ke sie yac sasuc, muhtwacwacackiyen suhmuh, ke kuht pahngonyuck in oruh pisap kuh prestuhn luhn Rilif Sosaiti, tukun tuhlihk uh sroacng ke lutlut ah, tukun kuht ritaerlac.

Kom tiac enenuh sie solsol met liki kom muhtwacwacack mukwi nuh ke inkacnek luhn finsrak suwohs lom an. Kom tiac enenuh in sano nuh ke lwelah in eklac mwet se ma kom luhmweyuck nuh kac uh. Kom tiac enenuh in sano in suliyuck in kuhlwaconsap ke Alu uh.

Kuhtuh pacl uh kuht kuh in tohllah wel yac puhs ke moul lasr uh tuhpan in suleyucklac (liye D&C 121:34–36). Tuhsruhkuhnac stuhuh se pa ingacn. Kom suleyucklac tari!

Ke kuhtuh pacl ke moul luhk uh nga tiac mutullac ke lainyacn ma elyah, toasr, kuh ahsor la sifacna. Tuhsruhkuhtuh upac lohstriyen fong uh, nga kwacna ahkkweyeyuck ke nuhnac se inge: ke lututacng faht ah fah takwack.

Ke lwen sasuc nuh kwewa, sie kuhsruhn lwen sasuc tuhkuh—tiac nuh ke facluh muhkwenah tuhsruhkuhtuh sesr pac. Ac ke sie lwen sasuc tuhkuh sie muhtwacwacack sasuc—sie pacl wowo in sifil muhtwacwacack.

Tuhsruhkuhtuh Meac Kuht Fin Tiac Orwaclah?

Kuhtuh pacl uh ma ma tulokihn kuht uh pa sahngweng. Kuht kuh in sahngweng lah kuht fah tiac orwaclah wo, lah kuht fah orwaclah wo, lah kuht

mwekihn, lah orwaclah wo kuh in ikihlkuhtlac, kuh lah ma ingacn kuh in ekuhllah mwet kuht luhngse uh.

Na kuht tuhpan. Kuh fuhlweack.

Siepac ma kuht enenuh in esam ke pacl in oakiyac finsrak uh pa ma inge: Kuht ac apkuhran na in fah tiac orwaclah wo—sahp ke kihtin pacl. Tuhsruhkuhtuh sahyacn suhpwacrlac, kuht kuh in ahkfokokoyeyuck ke srihp-
pen mwe etwacack inge eslah elyah ke in suwohs ingena uh. Akihlenyuck ma ingacn e ke muhtwacwacackiyac ah lah ke sie pacl kuh siepacna, kuht kuh in fototolac. In etuh ma inge met eslah yohkiyacn mwe lut ac puhla koluk ke tiac orwaclah wo.

Ke kuht sun finsrak lasr uh ke inkacnek se inge, orwaclah suhfahl uh tiac enenuh in sruok kuht. Esam, finne kuht koflah sun acn sahfah yohk srihpac, kenahkihyuck lasr ingena, ac fah oasr kapkapwack lasr ke inkacnek ma ac fah kol nuh kac uh.

Ac ma ingacn yohk srihpac—yohk kalmeyac na pwacye.

Finne kuht fototolac ke lain in kesso lasr uh, kalweni na fuhfahsryucsr uh fah ahkwoye kuht likina met ah.

Pacl Wowo Se Met in Muhtwacwacack Pa Ingena

Sie soakas mahtuh fahk, “Pacl wo se emet in yukiac soko sahk pa yac 20 somlah ah. Pacl wo se ahkluo emet an pa ingena.”

Oasr sie ma wolacna ac sesselah ke finsrak ke kaks se *ingena*. Oasr sie mwe ahkfokoko ke ma pwacye lah kuht fin sulacnah in nuhnkwaclah ingena, kuht kuh in fahsr nuh met ke pacl se na inge.

Ingena pa pacl wo se emet in muhtwacwacack eklac nuh ke mwet ma kuht kena in oruh uh—tiac nuh ke yac 20 muhkwenah tuhsruhkuhtuh ke ma pahtpaht nuh kwewa pac.

LUTI KE PWENG SE INGE

Prestuhn Uchtdorf el ahkuhtweyac lah ke kuht koflah in sun finsrak lasr uh, “kuht kuh in ahkfokokoyeyuck. . . Finne kuht fototolac ke lain in kesso lasr uh, kalweni na fuhfahsryucsr uh fah ahkwoye kuht likina met ah.” Siyuck sin mwet ke sucu an in akacsruhi ke puhlahkihyuck ma elos lotwelah yohk ke ohiyac sacn likina elos lotwelah liki ke ma sikyak an, ma oacna srolah liki lutlut kuh eisyacn sie opi.

Eklac Ke Kuhiyom Nohfohn— Muhtwacwacack Ingena

Prestuhn Uchtdorf el luti lah “finsrak luhn kais sie kuh in orwacalah kuhiyac wo emet kacsr uh.” Nuhnkuh in orwacalah kuhtuh finsrak ke acn luo kuh tolu ke moul lom an, ma oacna kuh in mahno, kuh in nguhn, ac akawuck, nuh ke mwe srihkarak. Orwacalah wowo fuhkah kom luhngse in eis ke acn inge ke yac se inge? Ke kom pruhe yohk in nuhnkuh ke kuhtuh finsrak uh, liye ahkwoyac lah elos kuh in eisyuck tuhsruhk fah oruh kom in kapwack. Ke mwe sihm nuhtum an, ahkuhtweyac finsrak lom an in wo kom in kuh in liye kapwack lom ke yac sacn tari uh.

© 2014 sel Intellectual Reserve, Inc. Kuh ac suwohs nuh kwewa fihliyucki. Sihmlac fin acn USA. Ahkkweyeyucklac ke kahs English: 6/13. Ahkkweyeyucklac ke lweng: 6/13. Lwenglah luhn *First Presidency Message, January 2014*. Kosraean. 10861 868



Misin Muhtahl luhn Jisus Kraist: Mwet in Srihkasrak

Luhlahlfongi, Sucu, Kahsruh

Pruhe in lutlutkihn ip se inge ac suk in etuh ma in akacsruhi kac. Kahlwemkihn moul ac misin luhn Mwet Lahngo uh ahkyohkye fuhkah luhlahlfongi lasr Kacl ac ahkinsewowoye mwet kom karihngihm uh ke forfor luti uh? Nuh ke kuhtuh pac ma in etuh, som nuh ke reliefociety.lds.org.

Pa inge ip ke kain in Pweng ke Forfor Luti ma sramsramkihn ip ke misin luhn Mwet Lahngo.

Ke kuht kahlwemkihn lah Jisus Kraist pa mwe srihkasrak lasr ke ma nuh kwewa uh, kuht kuh in ahkyohkye kena lasr in Ukwacel. Ma suhmuhslah uh sesseslah ke mwe ahkkweye nuh sesr in ukwe falcken Kraist. Nuh sin mwet lal Nephi, Kraist El fahk lah orekma ma elos liye El oruh pa elos enenuh in oruh uh, (liye³ Nephi 27:21). Nuh sel Thomas, Jisus El fahk, “Nga pa inkacnek, ac pwacye, ac moule; wacngihm mwet som nuh yurin Pahpah fin tiacke Nga” (John 14:6).

Mihsenge mwet kol lasr uh ahkacsmakihnye kuht in oruh Mwet Lahngo oacna mwe srihkasrak lasr. Linda K. Burton, prestuhn luhlahp luhn Rilif Sosaiti, el fahk, “Ke kais sie sesr oasr mwe luti luhn Iwacelah sihmlac loal insiacsr uh, na kuht fah muhtwacwacack in orwacelah kain mwet ma Leum El kena kuht in oacna uh.”¹

Prestuhn Thomas S. Monson el fahk, “Leum ac Mwet Lahngo, Jisus

Kraist lasr, pa Mwet in Srihkasrak lasr ac kuhiyacsr.”²

Lwelah kuht in sulaclah in foto-toyang nuh sin Jisus Kraist, in ahkos masap Lal uh, ac in kampare in fohlohk nuh yurin Pahpah tuhmwacsr Inkuhsrao.

Ke Ma Suhmuhsalah uh

2 Nephi 31:16; Alma 17:11;
3 Nephi 27:27; Moroni 7:48

Ke Ma Mahtuh Lasr

“El mahkiyac acn in fahsr uh ac kol inkacnek uh,” Eliza R. Snow el suhmuhslah, prestuhn luhlahp ahkluo ke Rilif Sosaiti, ke luti luhn Jisus Kraist ke El moule ah.³ El luti nuh sin kais sie mwet— sie sin sie. El luti lah kuht enenuh in som liki ma yucngucul ac yuc ah in molwelah ma tuhlac soko ah (liye Luk 15:3–7). El ahkkweyelah ac luti kais sie, finne eis pacel nuh sin kais sie mwet ke un mwet luhlahp 2,500 sac (liye 3 Nephi 11:13–15; 17:25).

Ke muhtwacn ke Mwet Luhlahlfongi ke Lwen-sahflah uh, Prestuhn Dieter F. Uchtdorf, Mwet in Kahsruh

Se Ahkluo ke Prestuhnsi Se Met, fahk: “Kowos tahmtahel wolacna uh sang kuhlwacnsap kuhlwacng nuh sin mwet sahyac uh nuh ke srihpac ma ahlukwelah kena nuh ke ma wowo lowos sifacna uh. Ke ma inge kom ukwe Mwet Lahngo. . . . Nuhnack lal uh kwacna nuhnkuh in kahsruh mwet sahyac uh.”⁴

MWE KAHSRUH

1. Linda K. Burton, “Is Faith in the Atonement of Jesus Christ Written in Our Hearts?” *Ensign* kuh *Liahona*, Nohfohpup 2012, 114.
2. Thomas S. Monson, “Meeting Life’s Challenges,” *Ensign*, Nohfohpup 1993, 71.
3. “How Great the Wisdom and the Love,” *Hymns*, no. 195.
4. Dieter F. Uchtdorf, “Happiness, Your Heritage,” *Ensign* kuh *Liahona*, Nohfohpup 2008, 120.

Meac Nga Kuh In Oruh Uh?

1. Fuhkah ac efuh tuh Jisus Kraist El mwet in srihkasrak se luhk?
2. Lutiye tahmtahel nga muhtwacta yohroh uh kahsreweyuc fuhkah in ukwe Mwet Lahngo?